

欽定日下舊聞考卷六十六

官署

原承安四年二月詔建太學于京城之南總爲屋七十

五區西序置古今文籍秘省新所賜書東序置三代鼎

彝俎豆敦盤尊罍及春秋釋奠合用祭器

大金國志

原大定二十八年四月命建女直太學

金史世宗紀

原京都有孔子廟而國學寓他署丞相興元忠憲王

鄂勒哲噶然曰首善之地風化攸出不可怠乃奏營廟

學元名臣事畧

欽定日下舊聞考

卷六十六

一

原至元六年七月立國子學二十四年閏二月設國子

監元史世宗紀

原燕京始平宣撫王楸請以金樞密院爲宣聖廟二十

有四年既遷都北城立國子學于國城之東乃以南城

國子學爲大都路學元史本傳

原時都城廟學既燬于兵楸取舊樞密院地復創立之

春秋率諸生行釋菜禮仍取舊岐陽石鼓列廡下同上

原王巨川於灰燼之餘草創宣聖廟以己丑二月八日

丁酉率諸士大夫行釋奠禮諸儒相賀曰可謂吾道有

光矣湛然居
士集

原至元二十四年既立國學以故孔子廟為京學而提
舉學事者仍以國子祭酒繫銜元史百
官志

原國子監在城東北即元之舊學洪武改為北平郡學
永樂仍為國子學又改為國子監正堂七間曰彝倫堂
元之崇文閣也中一間列聖幸學俱設座于此上懸勅
諭五通東一間祭酒公座面南司業座面西堂前為露
臺臺南中為甬路前至太學門長四十三丈聖駕臨幸
由之東西為墀諸生列班於此後堂三間東講堂三間

欽定曰下舊聞考

卷十六

二

西講堂三間藥房二間折而東為繩愆廳三間鼓房一
間率性堂誠心堂崇志堂各十一間博士廳三間鐘房
一間修道堂正義堂廣業堂悉如率性堂六堂乃諸生
肄業之所東折而南為廊房九間門一間西亦如之太
學門三間門東勅諭碑一通洪武十五年申明學制一
通洪武三年定學規碑一通洪武初年欽定永樂三年
申明學規碑一通洪武十六年并三十年欽定廟學圖
一通廟學規制地界四至丈尺畫鞞焉正統十二年十
一月初四日立外東井亭一又東為持敬門以入廟自

中少北爲儲門以通啟聖祠土地祠及典簿典籍掌饌
廳倉庫之路祭酒東廂亦由此入西井亭一又西爲退
省號門自西少北爲廣居門以爲司業入廂諸生入號
之路墀內雜植槐柏共二十株前爲集賢門三間門前
爲通衢東西牌坊各一題曰國子監監衢東西牌坊各
一題曰成賢街彝倫堂後齋明所九間格致誠正號每
號計三十七間嘉靖七年作敬一亭御製聖諭共碑七
座前爲大門題曰敬一之門祭酒廂房在亭東司業廂
房在亭西會饌堂一所在監東北土地祠五間在饌堂

欽定日下舊聞考

卷六

三

門之右典籍廳五間在饌堂門之左典簿廳三間掌饌
廳五間退省號及廣居門之西爲天地人智仁勇文行
忠信規矩準繩紀綱法度凡一十八號并退省房三連

混堂淨房各一所

春明夢
餘錄

原宣德四年八月修北京國子監大成殿前兩廡

明宣
宗實

錄

原宣德四年四月北京國子監請以國之東金吾等三
衛草場二所爲諸生構房舍其地給本監種蔬以會饌

從之

同上

原國子監在京城東北隅景泰中御史程璣請于東長

安街之南改創基址不允

國史唯疑 以上十二條原在北京市門今移改

增國子監兼管監事大臣

特簡無定員祭酒滿漢各一司業滿漢蒙古各一掌成均之法以教國子及俊選之士監丞掌學規以督教課糾勤惰均廩餼博士掌闡明經說以助啟迪典簿掌簿書以稽文移之出入均滿漢各一典籍漢一人掌經史以備諸生誦習率性堂漢助教一學正一修道堂漢助教一學正一誠心堂漢助教一學正一正義堂漢助教

欽定日下舊聞考

卷十六

四

一學正一崇志堂漢助教一學錄一廣業堂漢助教一學錄一掌教直省俊選之士八旗官學助教滿洲十有六蒙古八掌分教八旗子弟算法館助教漢一人掌分教算學生俄羅斯學助教滿漢各一掌分教俄羅斯子弟於官學及六堂助教內委員兼司之筆帖式滿四人蒙古漢軍各二掌文移繙譯

大清會典

增國子監在安定門內

文廟西堂曰彞倫堂堂左右為繩愆博士二廳率性修道誠心正義崇志廣業六堂門曰集賢門街曰成賢街

大清
一統志

臣等謹案黉倫堂東廊爲繩愆廳爲鼓房有率性誠心崇志三堂西廊爲博士廳爲鐘房有修道正義廣業三堂黉倫堂額及壁間聖經石刻皆

聖祖御書又堂額曰文行忠信前列

訓辭曰學者文行並重尤以忠信爲本故孔子垂爲四教成均造士之法無踰於此

世宗御筆也黉倫堂後爲敬一亭恭勒康熙四十一年聖祖訓飭士子碑並

欽定日下舊聞考

卷十六

五

御書四碑一曰功存河洛一曰嵩高峻極一曰靈瀆安瀾一曰昌明仁義外有明嘉靖間敬一箴碑及宋儒范氏心箴程子視聽言動箴各一最後爲

御書樓內尊藏

聖祖御製文集

世宗御製文集板及

御纂諸經並十三經二十二史各板本皆貯焉又有蘭亭記樂毅論明王同祖及

本朝謝履忠丁香花詩石刻黉倫堂後穿堂內祭酒司

業題名碑四後堂恭懸

上諭一通又老彭觀井石刻一東有崇實振雅二軒記
石刻康熙五十七年祭酒李周望撰穿堂內古文
孝經石刻一東北隅爲文公祠南學在國子監南
方家衚衕雍正九年建爲諸生肄業之所

又案國子監著有明洪武學制五朝上諭正統新
建大學及廟學全圖四碑今皆摧蝕不可讀

增八旗官學在八旗分地雍正五年以就學者衆卽各
旗官於各口入誦讀者建爲官學隸國子監

大清一統志

欽定日下舊聞考

卷三十六

六

臣等謹案八旗官學鑲黃旗在安定門大街圓恩
寺衚衕正黃旗在西四牌樓北祖家街正白旗在
朝陽門內南小街新鮮衚衕鑲白旗在東單牌樓
觀音寺衚衕象鼻坑正紅旗在阜成門內南巡捕
廳衚衕西口鑲紅旗在宣武門內頭髮衚衕正藍
旗在東四牌樓南新開路鑲藍旗在西單牌樓乾
石橋東斜街俱於乾隆三十四年重修

增順治九年

世祖章皇帝臨雍幸彞倫堂講書賜賚有加四氏子孫

隨班觀禮者俱送監讀書廣監生鄉試額十五名康熙八年

聖祖仁皇帝臨雍亦準順治九年例雍正二年

世宗憲皇帝詣學御製倫堂講書廣監生鄉試額十八名郡縣學量增入學名數琉球國自康熙二十七年遣子弟入監讀書後至是復遣就學而俄羅斯亦遣子弟入監讀書另設助教以訓課之後以四方拔貢入監者多於國子監南構房舍數百間謂之南學歲發帑銀六千兩給諸生膏火乾隆三年正月

欽定日下舊聞考

卷十六

七

皇上親詣辟雍釋奠於

先師孔子御製倫堂講書賜賚有加廣監生鄉試額十八名

特賜

諭旨訓勉多士五年

御製碑文賜南學

大清
一統志

增乾隆四十八年

皇上始命於國子監營建辟雍門外設柵欄屏牆左右坊座各一內爲集賢門門內左右井亭各一又北爲太

學門門內左鼓亭右鐘亭亭北當甬道中建黃色琉璃坊又北

御碑亭左右各一又北為圍河中疊石為方基其上建辟雍殿七楹周阿重簷戶牖洞達翼以崇廊四出陞六級河四面皆建橋座白石闌其廡列於

殿之兩旁者左則率性堂誠心堂崇志堂右則修道堂正義堂廣業堂圍河之北即

夔倫堂左右及堂後皆仍舊制國子監册

等謹案國子監自乾隆四十八年

欽定只下舊聞考

卷十六

八

皇上肇建辟雍至四十九年冬工竣五十年二月上丁釋奠

先師遂

親臨辟雍宣講大學為人君止於仁為人臣止於敬為

人子止於孝為人父止於慈與國人交止於信易

乾象天行健君子以自強不息仰惟

御論闡深發前聖所未發於時圍橋敬聽者王貝勒貝

子公滿漢蒙古大臣官員以逮衍聖公四氏賢裔

並來京之進士舉人生員監生及朝鮮使臣等翹

企聳躍頰首悅心共欽遭逢之盛茲敬紀大文之
昭揭成均者門外左右坊座額曰國子監第一門
立額曰集賢門第二門立額曰太學琉璃坊座
御書南面額曰園橋教澤北面額曰學海節觀
御碑亭二恭勒

御製國學新建辟雍園水工成碑記右清文左漢文
陰恭勒

御製三老五更說左清文右漢文

御製題張廷玉三老五更議

欽定日下舊聞考

卷六

九

辟雍殿前簷

御書立額曰辟雍內額曰雅涵於樂聯曰金元明宅於
茲天邑萬年今大備虞夏殷闕有聞周京四學古

堪循

寶座金屏恭鈐

御製上丁

釋奠臨新建辟雍講學得近體四首

辟雍殿兩旁六堂皆有立額其北卽

葵倫堂新奉

御書額曰福疇攸叙其舊制已見本卷前

增順治九年

皇帝勅諭國子監祭酒司業等官李奭棠古爾嘉渾等
聖人之道如日中天上資之以圖治下學之以事君爾
等當嚴督諸生盡心訓誨諸生當敬奉師教身體力行
教有成效時惟師長之功學有實用方盡弟子之職如
訓導不嚴怠肆失學師生俱難免咎戾尚其勉之故諭

增康熙八年

皇帝勅諭國子監祭酒司業等官賈祿宋治宜等朕惟

欽定曰下舊聞考

卷十六

十

聖人之道高明廣大昭垂萬世所以興道致治敦倫善
俗莫能外也朕纘承丕業文治誕敷敬仰

先聖至德令行辟雍釋奠之典將以鼓舞人才宣布教
化爾監臣當嚴督諸生潛心肄業諸生亦宜身體力行
朝夕勤勵若學業成立可裨實用則教育有功其或董
率不嚴荒乃職業爾師生難辭厥咎尚其勉之母忽故
諭

增雍正二年

皇帝勅諭國子監祭酒司業等官塞楞額王傳等朕惟

聖人之道昭揭日月彌綸天地萬世帝王下逮公卿士庶罔不仰遵成憲率由教言我國家尊崇

至聖遠邁前代朕纘承大統古訓是學維日孜孜茲雍正二年二月朔日親詣辟雍祇謁

先師孔子行釋奠禮思以鼓勵羣英丕隆文治爾監臣宜嚴督諸生善爲導誘爾諸生亦當殫心肄業實踐躬行秉端方以立身敦忠孝以興誼勿營奔競勿事浮華文必貴乎明經學務期乎濟世俾品成誼進以副朕教育至意此爾多士之庶亦惟爾監臣董率之功也慎勿

欽定曰下舊聞考

卷六

十一

怠荒職業以貽爾羞諸師生其共勉之故諭

臣等謹案國子監署內

列聖訓諭凡通行巽序者例皆敬謹立石茲卷旣以官

署標名惟紀其關於本署者恭載

垂訓成均各條餘詳國子監志

乾隆三年

皇帝勅諭管國子監事尚書孫嘉淦祭酒國璉李鳳翥等仰惟我朝

列聖以聖人之道治天下用開太平鴻業

聖祖

世宗皇帝降

師超越百代作人造士化洽寰區朕嗣守丕基勤求至道思所以廣勵學官祇紹

前烈越乾隆三年三月二日親詣辟雍釋奠於

先師孔子升堂進講嘉與諸生闡明聖教之本原帝治之盛軌夫端教術育賢才厥惟師儒之功正身心修德業以爲國家之用諸生其可弗勉哉詩曰古之人無斁譽髦斯士放勳曰使自得之又從而振德之我

欽定四庫全書

卷十六

三

祖宗教澤涵濡薰陶長養百年於茲正學昭明揭若日月爾監臣欽承

至訓振作而鼓舞之罔有怠斁諸生率乃攸行敦本務實希賢希聖夙夜罔愆俾國家文治光裕於億萬年懋哉懋哉特諭

增乾隆四十八年奉

上諭稽古國學之制天子曰辟雍所以行禮樂宣德化昭文明而流教澤典至鉅也此次

釋奠禮成念國學爲人文薈萃之地規制宜隆而辟雍

之立自元明以來典尚闕如自應增建以臻美備著派禮部尚書德保工部尚書兼國子監事劉墉侍郎德成敬謹前往閱視度地鳩工諏吉興建落成之日朕將舉行臨雍典禮以昭久道化成之盛欽此

增乾隆四十九年奉

上諭稽古明倫設教典重學宮國學爲首善之區橋門觀聽規制尤宜隆備前命尚書劉墉德保金簡侍郎德成鳩工庀材興建辟雍現在已屆落成朕於明年仲春釋奠禮成卽臨雍講學所有應行典禮着該衙門詳議欽定曰下舊聞考

卷十六

三

具奏欽此

增

先師廟在安定門內太學左南嚮街門西爲持敬門西嚮大成門崇基石闌前後三出陛門左右列戟二十有四石鼓十右石鼓音訓碣一左右各一門門內東西列舍北嚮

大成殿崇基石闌三出陛兩廡東西嚮殿東西列舍南嚮西廡南燎鑪一西北率坎一甬道左右

御碑亭

大成門外東爲

神厨宰牲亭并亭各一西爲

神庫致齋所更衣亭每科進士題名碑分列左右凡正殿正門碑亭皆覆黃色琉璃後爲

崇聖祠 大清會典

臣等謹案

文廟門殿乾隆二年奉

上諭易蓋黃瓦三十二年

欽定大門額曰

欽定曰下舊聞考

卷十六

十四

先師廟二門額曰

大成門殿額曰

大成殿並

御書題榜又殿內恭懸康熙二十四年

聖祖御書額曰萬世師表雍正三年

世宗御書額曰生民未有乾隆三年

皇上御書額曰與天地參聯曰氣備四時與天地鬼神

日月合其德教垂萬世繼堯舜禹湯文武作之師

三十四年

御書聯曰齊家治國平天下信斯言也布在方策率性

修道致中和得其門者譬之宮牆甬路東西分列

碑亭恭勒康熙二十五年

聖祖御製

至聖先師孔子贊二十八年

御製顏曾思孟四贊雍正六年

世宗御製仲丁詣祭

文廟詩乾隆四年

皇上御製臨雍紀事碑五年

欽定曰下舊聞考

卷六

五

御製仲秋釋奠詩九年

御製仲春釋奠詩十八年

御製仲秋釋奠詩二十一年

御製仲春釋奠詩二十四年

御製太學古槐詩二十三年

御製重修

文廟碑三十四年

御製仲春釋奠詩恭載卷內若廼

鴻謨

駿烈揚示威均以昭在泮告功之盛者則有康熙四十

三年

聖祖御製平定朔漠告成碑雍正三年

世宗御製平定青海告成碑乾隆十四年

皇上御製平定金川告成碑二十一年

御製平定準噶爾告成碑並

御製伊犁勒銘二十四年

御製平定回部告成碑四十一年

御製平定兩金川告成碑全文具載國子監志茲卷惟

欽定四庫全書

卷十六

六

敬紀其事及歲月云

又案乾隆四十八年

御製仲春釋奠詩五十年

御製仲春釋奠詩今謹並勒

大成殿前

增順治十四年

諭工部文廟崇祀

先師孔子所關典禮甚重今已年久傾圮若不速爲整

理後漸頽壞葺治愈難朕發內帑銀三萬兩特加修葺

爾部卽傳諭行

增雍正九年

諭禮部

孔子道冠古今爲萬世師表薄海內外無不俎豆尊崇國學乃四方表率其制尤重

聖祖仁皇帝臨雍釋奠典禮優隆朕繼承大統景仰先型羹牆如見念國學爲造士之地聖教所被莫先於此恐歷歲旣久有應加修葺之處爾部會同工部詳加閱視凡

欽定日下舊聞考

卷十六

七

文廟殿宇廊廡及講堂學舍務須整理周備俾廟貌聿新以申景慕朕將親詣焉

增乾隆二年

諭禮部

至聖先師孔子天縱神聖師表萬世尊崇之典至我朝而極盛

皇考世宗憲皇帝尊師重道禮敬尤隆闕里

文廟

特命易益黃瓦鴻儀炳煥超越前模朕祇紹

先猷切思國子監爲首善觀瞻之地辟雍規制尤宜崇飾大成門大成殿著用黃瓦崇聖祠著用綠瓦以昭展敬至意

國子監志

增乾隆三十三年

諭內閣修葺

文廟現屆落成太學規模式昭輪奐惟門題殿榜尚應詳考夔章用申景仰向來正殿稱

先師廟二門曰廟門而大門未有書額蓋沿明代舊文未加釐正夫廟門之號于禮經所稱祖廟旣涉嫌疑而

欽定曰下舊聞考

卷十六

六

先師廟額揭諸殿楹名實尤多未稱應于大門增

先師廟額其正殿改爲大成殿二門改爲大成門庶符會典定制朕親書勝字涓吉恭懸以彰崇道尊

師之至意

同上

增又奉

上諭國學崇祀

先師規制法程美備是飭我

列祖右文重道尊禮有加朕於臨御初卽詔易黃瓦儀惟其隆邇以殿廡歲久弗葺特發帑金二十餘萬鳩庀

鼎新勅大臣董厥成輪奐視舊增益工就告歲而門殿諸額向沿明張璠陋議非所以肅觀瞻明折中也既依會典定名躬爲榜書並宣諭釐正大指茲復親製碑記具修建原委且于幾暇手書付鏡表示鄭重將以明年仲春詣學釋奠落成之彰盛典焉遐稽

闕里廟堂有後漢時犧象諸尊以爲美觀爰擇內府所藏周範銅鼎尊卣壺簠簋觚爵洗各一頒置太學陳之

大成殿中用備禮器夫

欽定日下舊聞考

卷六

九

孔子志在從周楹間列周朝法物于義惟允所司其敬凜將事典守勿替以克副朕意欽此

同上

臣等謹案乾隆三十三年

欽頒陳設

廟庭禮器犧尊一雷紋壺一子爵一內言卣一康侯鼎一盟簋一雷紋觚一召仲簠一素洗一犧首鼎一皆周時法物

補京師設國子學教授諸生于隨朝百官集賽及蒙古

漢兒官員選擇子孫弟姪俊秀者入國子學

元典章

原至正十五年六月中書叅知政事實勒門言舊立蒙古國子監寺教四集賽并各愛滿官員子弟今宜諭之依先例入學俾嚴爲訓誨從之二十年十月朔甘露降于國子監大成殿前柏木元史順帝紀按實勒門滿洲語鷓子也舊作實理門愛滿滿洲語部落也舊作愛馬今俱譯改

原中統元年許衡爲國子祭酒未幾謝病歸至元八年以集賢大學士兼國子祭酒帝親爲擇蒙古弟子俾教之衡聞命喜曰此吾事也元史本傳

原至元八年先生授集賢大學士國子祭酒有旨教蒙欽定四庫全書 卷六 三

古生四人後又奉旨教七人又四方及部下願受業者俱得與其列卽南城之舊樞密院設學先生奏召舊弟子散居四方者王梓韓思永蘇郁耶律有尚孫安高凝姚燧及其弟燉劉季偉呂端善劉安中白棟皆驛致館下爲伴讀國學事跡

原先生之教人也恩同父子義若君臣因其所明開其所蔽而納諸善時其動息而張弛之慎其萌蘖而防範之其日漸月漬不自知其變也日新月盛不自知其化也其言談舉止望而知其爲先生弟子卒皆爲世用也

原延祐元年四月立回回國子監

元史仁宗紀

原延祐七年四月罷回回國子監

元史英宗紀

原皇慶元年二月朔徙大都路學所置周宣王石鼓于

國子監二年六月建崇文閣於國子監

元史仁宗紀

補崇文閣元藏書之所也今東講堂有碑存

明太學志

原國子監候日影到堂後梨樹散學

金臺集

補至大四年八月芝生國學大成殿延祐二年三月芝

生大成殿五年七月芝生大成殿

元史五行志

欽定日下舊聞考

卷十六

三

原先是太學因元之舊吏部主事李賢上言國家建都

北京以來佛寺時復修建太學日就廢弛舉措舛錯何

以示法天下請以佛寺之費修舉太學從之正統九年

正月太學成上臨視祇謁先聖行釋奠禮退御彝倫堂

命祭酒李時勉進講

明典彙

補太學堂有七彝倫所以會講率性修道誠心正義崇

志廣業則諸生肄業所也

西隱集

補廟學建於正統癸亥至弘治十四年尚書曾鑑請修

堂宇垣牆并會饌堂十六年工竣櫺星門前舊有小巷

曩清積穢乃買劉福姚浩等地東西濶七丈五尺深入四丈高築屏牆上覆以青琉璃瓦兩旁築小紅牆前爲闌干以擁護之

明太學志

原兩京孔子廟易琉璃瓦白萬厯庚子始從司業傅新

德請也

國史唯疑

補內外學舍之制內號在廣居門右門一座曰退省號舍四連共四十九間其南滷室與厠自退省門漸北折而西爲天地人知仁勇文行忠信規矩準繩紀綱法度共十八號每號計二十一間度字號北有保安堂五間

欽定日下舊聞考

卷十六

三

以處監生之有病者養倫堂後有格致誠正四號計九十八間嘉靖七年改建敬一亭外東號在廟左共三十四間大東號在東城之北居賢坊賽百萬倉西門街門二一曰登俊號舍東西二連共四十間一曰集英號舍二十七間新南號在北城二條衚衕東口門一座東西房二連共三十四間南北四間小北號在居賢坊衚衕門一座南北房二連共八十間交趾號在監之南門一座南北房二連共二十八間西號在成賢街之西北去監五十步舊雲閑寺址也小房十間又房二層計九間

本監官屬遞居之北小房四間南一間近西小房十餘

間明太學志

補監規國子生由廣業堂肄業以漸升至率性堂然後

積分量與出身同上

補監丞稱太學司直所居曰繩愆廳亦曰東廳博士別

有廳稱為西廳同上

補視學規制國子監先期灑掃內殿設御座於彝倫堂

中駕至則學官率諸生叩迎升座則率諸生叩拜受經

則諸生環聽階下還朝宴賞則率諸生叩謝敬事草

欽定日下舊聞考

卷十六

三

原弘治改元駕臨太學有聖駕臨雍錄一卷具載勅旨

奏章禮儀文移講議官職等事百川書志

補隆慶元年駕幸國學朝鮮陪臣李榮賢等六員各具

本等衣冠赴彝倫堂外立文臣班次之次明太學志

原崇禎十四年重修太學成八月車駕臨雍祭酒南居

仁坐講臯陶謨司業羅大任講易感卦命文武官三品

以上俱坐聽賜茶講畢上入敬一亭觀世宗所立程子

四箴碑遂傳禮部將廟學諸碑俱摹拓進覽又石鼓文

殘闕亦令察補進呈三朝野史

補崇禎十四年八月十八日車駕臨雍釋奠禮成上步至東西兩廡徧閱諸先儒神位諭禮部國子監諸臣曰宋之周邵二程張朱六子有功聖學今概稱先儒禮殊未稱爾部其會同翰詹官議所以尊崇之明年二月議定進稱先賢改題六子木主位列七十子之下漢唐諸儒之上告於先師得旨允行

鴻一亭筆記

補崇禎己卯上銳意復古倣周試士射宮之制命於賓興後羣聚較射於國學之觀德堂射者皆戎服壬午亦

然四思堂文集

欽定日下舊聞考

卷十六

書

補洪武中國子生出使視行人如覈天下土田稽百司案牘督吏民修水利出有賜還有勞永樂初頒詔諭訪輯高皇遺文至同十三道御史問刑慮囚皆舉重務以試之然雖勞績有成無不復監卒業者其後有長差短差之例長差若清黃寫誥之屬短差若承運庫試字司禮監膳本禮部寫民情中書科膳黃之屬短差復監長差則例滿附選待除不復監矣

明太學志 以上二十五條原在都市門今移改

增洪武時國子生殷敏選入武英殿紀事授監察御史

蓋其時儲養國學有出使歷事之任又有大本堂讀書

武英殿紀事等清要之職故賢才多出其中春明夢餘

原正統十一年太師英國公暨侯伯二十餘人早朝畢奏曰臣等皆武夫不諳經典願賜一日假詣國子監聽講上命以三月三日往祭酒李先生時勉命諸生立講五經各一章講罷設酒饌飲甚懽先生命諸生歌鹿鳴之詩賓主雍雍抵暮而散亦太平盛事也寓圃雜記

原國初高麗遣金濤等四人來入太學洪武四年濤登進士歸國其後各國及土官亦皆遣子入監監前別造房百間居之名王子書房有奏歸省者命禮部厚賜以

欽定日下舊聞考 卷十六 五

榮其歸今太學前有交趾號房蓋成祖設北監以來所以處交趾官生者長安客話

原都城東北隅坊曰崇教街曰成賢國子監在焉國初本北平府學永樂二年改國子監左廟右學規制大備彝倫堂之松元許衡手植也帝京景物畧

補虞文靖謂許文正歿後國子監始立官府刻印章蓋文正為祭酒時尚在舊學所謂王宣撫宅也今國學彝倫堂前樹傳是文正手植殆未必然查浦輯聞

原北京國子監版書有喪禮一千二百八十二片類林

詩集六十二片西林詩集三十片青雲賦五十片字苑
撮要一百二十七片韻畧四十五片珍珠囊八十二片
玉浮屠十七片孟四元賦一百十三片天下書目以
市門今
移改

臣等謹案此所載明代書版藏之國學者今皆散佚無存矣

原昔人好取華麗字以名類事之書如編珠合璧彫金玉英玉屑金鑰寶匱寶海寶車龍筋鳳髓麟角天機錦五色線萬花谷青囊錦帶玉連環紫香囊珊瑚木金鑿香藥碧玉芳林之屬未能悉數聞國學鏤版向有玉浮屠不知何書當亦屬類家也又有孟四元賦孟名宗獻字友之自號虛靜居士金時魁于鄉于府于省于御前

欽定四庫全書

卷十六

三

故號四元其律賦為學者法然金史不入文苑之列惟見于劉京叔歸潛志耳 淶水亭雜識

原唐太宗聞蘭亭真蹟在僧辨才處特遣御史蕭翼賺得武德四年收入秦府貞觀十年始命湯普徹馮承素諸葛貞歐陽詢褚遂良臨之而歐褚留傳最著後之所謂定武本歐所臨也所謂唐絹本褚所臨也定武本當時刻石禁中每紙已直萬錢迨後石晉之亂遼人輦之而北路棄殺虎林慶歷中李學究得之其子負官緡無償時宋景文守定武乃以帑金代償納石於庫熙寧間薛師正出牧刊一別本以應求者此郡真贋已有一刻

矣其子紹彭又摹之他石潛易古刻又剔損古刻湍流帶左右五字爲識大觀中詔向其子嗣昌取龕宣和殿後靖康之亂金人取石鼓及蘭亭叙重瓊輦至燕石鼓在國學而蘭亭不知所在矣今存國學者疑是定州薛師正翻刻本或薛紹彭所刻本雖非古刻然元人不能也此石一云明初出天師庵土中一云元順帝北還重瓊裹載棄之于路徐中山取置國學未詳孰是

春明夢餘錄

補桑澤卿蘭亭考載何子楚跋定武本云大觀間詔取石龕置宣和殿丙午與岐陽石鼓俱載以北今國學本

欽定日下舊聞考

卷十六

三

安知非與石鼓俱載而北者

炙硯錄 以上二條 原在城市門今移改

臣等謹案國學蘭亭叙石刻相傳爲定武本者今已無可考

原唐僧洛陽亞棲草書得張顛筆意草書千文在國子

監 格古要論補

原趙文敏公臨王右軍樂毅論黃庭經蘭亭定武本顏魯公爭座位帖張平叔金丹四百字五碑俱在北京國

子監

考槃餘事 以上二條 原在城市門今移改

臣等謹案今所存惟蘭亭叙樂毅論二臨本至黃

庭經爭座位金川四百字諸刻已佚

欽定日下舊聞考

卷十六

天津人瑞校

欽定日下舊聞考卷十六